

02/10/2001

Dr Mahathir tetamu pertama rancangan In Conversation

KUALA LUMPUR, Isnin - Buat pertama kali dalam sejarah penyiaran di Asia Tenggara, empat stesen televisyen swasta rantau ini bergabung menerbitkan program wawancara dengan pemimpin serantau, In Conversation.

Program sejam itu, yang dijangka disaksikan lebih 300 juta penonton rantau ini, diterbitkan oleh Sistem Televisyen Malaysia Berhad (TV3) bersama stesen televisyen ITV Thailand (ITV), RCTI Indonesia (RCTI) dan ABS-CBN Filipina (ABS-CBN).

Episod pertama program itu yang merakamkan temu bual dengan Perdana Menteri Datuk Seri Dr Mahathir Mohamad, akan disiarkan pada jam 9.00 malam esok.

TV3, dalam satu kenyataan hari ini berkata, selain Dr Mahathir, beberapa pemimpin lain seperti Perdana Menteri Thailand, Thaksin Shinawatra dan Perdana Menteri Singapura, Goh Chok Tong sudah menyatakan persetujuan untuk menjadi tetamu rancangan itu.

Rancangan bulanan itu akan dihoskan Pengurus Besar Kanan Divisyen Berita dan Ehwat Semasa TV3, Datuk Chamil Wariya; Pengarang Berita Luar Negara ITV Thailand, Chib Jitniyom; Penerbit Berita RCTI, Roy Tindage; dan Ketua Koresponden dan penyampai berita ABS-CBN, Korina Sanchez.

Episod kedua In Conversation dijangka menemu bual Thaksin di studio ITV Bangkok, pertengahan bulan ini.

Program tajaan Tenaga Nasional Berhad itu bertujuan memberi ruang kepada pemimpin rantau ini mengemukakan pandangan terhadap isu semasa untuk tatapan penduduk rantau ini.

(END)